



明分省人物考 七十一之二




漢書門	
八	九
二	九
四	二
冊	架
函	號
類	

內閣文庫	
二	八
七	九
函	二
二	六
四	四
架	冊
函	號
類	

內閣文庫	
番號	漢 8885
冊數	64( 42)
函號	287 161





人物考卷之七十一目錄

福建泉州府二

陳亦言

莊逢辰

趙士亨

龔炯

陳章應

張忠

王彥英

蔣疇

余福

朱則文

黃維清



夏秦

朱鐸

陳道曾

陳安

趙應



李思鄒

崔惠

葉秉乾

莊敏

朱鑑

李珙

蔡清

顧珀

留志淑

楊智

李聰

傅浚

黃瑗

張岳

陳琛

史朝賓

黃傑

林性之

鄭懋中

張廷芳

趙復

王慎中

蘇士潤

周天佐

楊逢春

蔡貴易

郭楠

丘養浩

李源

蘇志仁

詹寅

陳讓

黃馴

詹仰庇

蕭騰鳳

李廷機

補遺

謝璉

陳道基

蘇濬

楊道賓

本朝京省人物考卷之七十一  
福建泉州府

陳亦言

陳亦言字汝納晉江人至正間由古田侍父瓊來官  
晉江汭州鹽場因家焉平生不樂仕進刻苦力學貫  
穿經傳子史尤工詩賦同時蕭子玉趙應嘉張仕寬  
邵右田輩常相往還講論吟咏年幾八十卒有潛齋  
集

莊逢辰

莊逢辰字士明生於元季躬勤種藝以奉母雖在亂



離中手未嘗釋卷母卒喪葬一據考亭家禮國家統  
一寰宇或勸其出仕辭曰嚮遭亂離首領且不保今  
幸際太平足矣敢贅榮進乎日惟教子讀書鄉後進  
多師事之稱靜齋先生後以子琛恩贈大理評事

趙士亨


趙士亨字應嘉晉江人試吏于縣未幾棄去杜門讀  
書移家九峯山父蚤喪明母復風癱而奉養極其甘  
旨湯藥必親累歲不少解父母卒喪葬盡禮廬墓以  
終制時山寇呂光甫等嘯聚剽掠村落焚民廬舍每  
相戒勿犯其居後教授于鄉洪武初以人材授繁昌  
仰窪河泊官以告歸卒于家

龔 炯

龔炯字延璋晉江人敦厚周慎刻志為學詩文為當  
時所稱書翰遒勁端嚴得歐陽率更筆意洪武中應  
薦以二親年高上疏乞歸終養卒于家

陳章應

陳章應晉江人洪武中進士初授榆次縣丞調安丘  
藩憲考其學優廉幹以狀聞特降旌榜嘉之仕至禮  
部主事卒于官其孫道曾性資朴茂邃于易舉進士  
改庶吉士自陳願授學職三歷廣文所至以師道自



任云

張忠

張忠晉江人永樂壬寅由太學生擢監察御史有能聲陞廣東按察司僉事累平賊寇以靖地方致仕卒

王彥英

王彥英晉江人永樂中舉進士擢行人持已端謹陞吏部員外郎能聲著聞尋遷山西布政司左叅議卒于官

蔣疇

蔣疇南安人永樂中進士任監察御史貞度肅僚凜有風采所按屬貪墨吏先拔家而去其審覆多所平反士類以大用期之無何丁母憂而卒

余福

余福惠安人永樂中進士授行人使交趾宣達有體夷人悅服以金銀器用贈峻拒不受文廟廉知之深加嘆獎未幾巡北京剛直積忤當道出知撫州府再左遷太平府同知福爲人短小兩目炯然遇事慷慨不爲利害趨避卒與世齟齬不至大用云

朱則文

朱則文諱虎晉江人幼失怙恃鞠於伯父德善遭元

末兵亂欲殺德善以取材則文起抱號泣求以身代  
兵感其義遂兩釋之洪武間夢神告曰天錫金助汝  
不給已而果獲金數十錠不以營貲產悉濟貧乏後  
以子鑑恩贈右副都御史

黃維清

黃維清字源潔晉江人弱冠領洪武甲子鄉薦明年  
登進士第歷職郎署以才諳聞陞九江知府特賜  
勅以往九江土瘠民漓號稱難治維清廉勤平恕漸  
著治蹟卒于官

夏秦

夏秦字西仲晉江人少讀書凡經傳子史靡不周覽  
教授鄉里郡守胡器與部使者多造其廬咨以政治  
洪武十八年召試京師欲任用之自陳年老乞骸骨  
歸簞瓢屢空晏然以終老年九十六卒

朱鐸

朱鐸字允學晉江人七歲能對偶十歲能詩語皆超  
絕弱冠第永樂丙戌進士授官戶部主事性簡亢寡  
合退而家居以經史自娛請文者戶踵常接得之者  
以爲榮郡中石刻多出其手卒年九十有文集藏于  
其家



陳道曾

陳道曾字端誠晉江人章應之孫性資朴茂遂於易旁及諸經子史發爲文章詞義精到制行卓然不苟徇流俗第永樂戊戌進士改戶科庶吉士自陳願受學職授吳縣教諭陞瑞州府教授遷無爲州學正所至以師道自重爲湖廣浙江山西考試官俱以公明稱卒于官所著有吳下集筠陽濡湏等藁

陳安

陳安字克成晉江人第永樂辛卯進士授工部營繕司主事以才行聞陞衡州知府爲政清簡屬歲饑安不待報開倉賑恤尋丁內艱服闋改重慶府後患足疾民苦遮畱之扶曳而治者幾二載竟以老疾辭歸卒年八十

趙應

趙應字孟剔晉江人弱冠入邑庠以誚誤謫爲吏宣德間授南昌典史當道者薦其才擢知浮梁縣政教浹於士民威令行於狡猾縣東南有青峯渡灘水悍急歲恒一覆舟溺者甚衆應具牲醴爲文祭之自是患息滿九載民相率乞畱陞六品秩仍知縣事再滿秩丁內艱服除疏乞致仕年八十四而卒

李思鄒

李思鄒晉江人有勇力頗讀書知大義正統十四年沙尤鄧茂七作亂黨酋吳四官據黃山人皆望風奔投脅思鄒往思鄒正色叱之曰我太平百姓豈從汝輩為盜耶遂以義倡鄉里從者四百餘人立柵為禦備屢與賊戰俱勝一日早適大霧晦冥咫尺不辨賊乘間襲其柵眾倉卒奔潰思鄒獨率六七十人當柵門力戰為賊所殺暨斂顏色如生人皆異之

崔惠

崔惠字迪吉晉江人宋進士拱之後天性純篤學問淹貫由鄉貢士任江西石城縣教諭正統戊辰叛賊陳椿陷石城執惠逼令從已惠罵賊不釋口驅迫行里許會賊燬草營遂投火自焚而死

葉秉乾

葉秉乾同安人慷慨尚義正統辛酉歲饑出稻二千石入官儲以賑貧民歲已巳沙尤寇發延及諸邑秉乾倡義率民兵屢戰不利被擒賊脅其從已罵曰吾奉義討賊不幸力屈速殺為幸豈從汝反耶賊猶不忍殺諭之數四不屈而死成化初御史涂棐奏旌其門曰忠義



莊敏

莊敏晉江人正統中進士任吏科給事中骨鯁立朝論諫務存大體後出守雷州威儀嚴重喜怒不形人不見其有為而事無不治云

朱鑑

朱鑑字用明晉江縣人由乙榜舉人授教諭秩滿擢監察御史巡按湖廣名聞於朝留三載始代歸其巡按廣東奉命讞獄全活者衆招撫逋叛恩威並著用薦陞山西左叅政使未幾以北虜入寇陞右副都御史巡撫山西提督雁門等關凡處置大小事悉得其宜正統己巳聞京師戒嚴築城浚池練兵收馬為備禦計韃賊入界時夜雪士卒難之鑑曰此李愬入蔡時也一鼓俘之人謂西北鎖鑰乞歸不允召還叅佐院事再乞休致許之家居二十七年卒年八十八賜祭葬如例錄孫輜為太學生鑑公廉謹恪見事明敏片言之間是非曲直立斷所至吏畏而民懷嘗上書言十數事皆國家大計賜詔褒之閩士通顯以政事稱者鑑其一云

李珙

李珙字廷璧南安人由胄監除知蕭山縣縣俗生女



多不舉珙立法禁之其俗稍革蒞官廉勤公慎邑民  
安之景泰元年以父喪去任民遮道悲泣服闋改懷  
集縣後乞休致年八十四卒

蔡清

蔡清字介夫晉江縣人成化甲辰進士授禮部主事  
弘治三年改吏部稽勳司六年陞驗封司員外郎養  
病尋起禮部郎中十三年因彗見疏時政以弭天變  
言中官李廣尚在朝班惟是紀綱廢弛故士風日壞  
甚至宦官廝養宅舍擬公侯金銀動萬計而錙銖取  
民者多充債將之家轉運權倖之門民力詘兵力弱

尚忍言哉今欲揀之必先正心用人下部知之尋陞  
江西提學副使正德初忤寧藩欲傾之遂致仕正德  
三年十二月起南京國子監祭酒未至卒生平飭躬  
砥行不入俗浮靡好學至老不倦以六經爲正宗四  
書爲嫡傳以周程張朱爲真派研精殫力摹擬闡解  
學者宗之曰虛齋說也在江西務端士習正文體嘗  
曰學宜養正性持正行聖賢言語熟復玩味則舊去  
新來日改而月化天性孝友內外親族貧無衣食及  
不能葬者皆收恤之家雖屢空恒借貸以自給而公  
弗之計也其學術德器爲一時名儒云


顧珀

顧珀字載祥晉江人童時卽善偶對稍長刻苦力學弘治乙卯領鄉薦己未舉進士除知虹縣有惠政丁父憂正德丙寅起復補旌德察民瘼擇所宜利者行之於訟獄立爲剖白每化以情鄰邑有淹繫數年不決者咸來求質尤勤積貯值闔郡歲饑獨旌民得免苧移爭樹碑頌德擢守和州復罹大饑倒倉庫所蓄賑之不俟申報巡按捧部檄督逋賦甚亟珀計民貧無措召富商諭以大義商各輸所有貸官至秋成還之商民俱無累州有蘆課勢家侵佃相仍查收買者

給批輸限無敢違者以治行擢南京考功郎中丁母憂服闋改除庫部諸司薪隸舊以衙門大小有軒輊珀革積蠹一例分給人無間言收倉厥俸米除斛面杜侵盜納戶稱便京衛勾解多影射爲奸珀於清勾冊內弔戶部月支冊查對積猾不敢欺隱軍士有功陞職官原籍多解丁補伍珀請行印綬監查黃是實將戶丁發回原籍當差軍充重役陞湖廣布政司叅議督儲各府起運錢糧及王府祿米衛所糧餉節年負額幾倍珀設法綜會賦以不虧屯田瀕江以堤岸圯壞不修捐屯額查累年拖欠軍士月糧每石折銀

三錢令軍士砌石一丈者給銀六錢不加賦而堤岸  
悉報完行部至蘄有妖僧詐稱奉 勅往名山掛旛  
所在恣橫珀密發其奸置之法巳卯寧庶人反南昌  
珀駐黃梅扼險為池皖援會 武廟親征人爭逃竄  
珀榜諭安輯地方恃以無恐事平乞休 世宗入承  
大統以護送 聖母勞有金幣之賜復上疏乞休奉  
旨准致仕薦剡歲聞至嘉靖五年起四川按察司副  
使整飭威茂二州珀至修理城堡墩臺關口召募武  
勇彈壓羌夷歷年賞番虛糜歲計五萬餘兩一一核  
實餘銀幾萬兩廣募民鑿石坎開大衢便商往來吐

番來貢挾利器珀創會館差官把守令夷人釋刀易  
馬乃入郭民免毒擾後守為定規踰年陞河南右叅  
政又明年陞江西左布政使值賓興廷差京官主考  
珀職提調嚴關防去取悉裁自內廉人稱得體時朝  
廷有龍虎山之役珀不忍派民因查庫藏見三巨桶  
封識朽敝簿籍不載啓視之為金遂申撫按以此銀  
署工程餘作歲例差官解部是秋擢南京太僕寺卿  
檢舊牘振舉馬政見近郊腴田荒蕪問之係屯田以  
官徵上手拖欠故不敢耕珀令軍民人等開墾成田  
之後照畝徵糧以足屯額不失巳丑陞南京太常寺



本朝分省人物考 卷七十一 朱秀  
卿尋陞南京戶部右侍郎珀署篆疏上便宜十二事  
畱心度支京廩充溢攝憲部攝都臺兼督江防俱勤  
慎不懈及見各衛所屯田久拋荒不耕仍比徵屯糧  
乃與屯田御史疏請除豁畝數追徵則例遵守至今  
在部五年致仕卒年八十六祀鄉賢

畱志淑

畱志淑字克全號朋山永春人十六遊蔡虛齋之門  
一見稱其遠器十八卅角以儒士領弘治戊午鄉薦  
登乙丑進士授温州府推官三年爲刑部主事遷員  
外郎郎中守杭州杭當要衝征人使客終絡交道有

司濫取曲承以希延譽鎮守織船中官相繼漁獵數  
十爪牙旁午入郡如虎狼淑一切裁正或寘之法鎮  
守恚欲乘相見倨挫淑簡執不爲屈已卯代鎮爲畢  
真逆濠黨也至自江西聲勢翕赫擁從牙士五百餘  
人肆行殘賊人人自危淑密得其不可測之狀白臺  
察監司陰制之未幾真果構市人一夕火其居延燒  
二千餘家淑恐其因衆以爲亂閉門不出止傳報諸  
衙門人毋救火餘數日果與濠通變真將發應濠臺  
察監司召淑定計先提民兵伏真門外監司以常禮  
見出淑入真怒曰知府以我反乎應曰府中役從太

多是以公心跡不白因令左右出報監司既入卽自  
堂上執真手與語當自白之狀衆共語遣所不藉之  
人以釋衆疑真倉卒不得已呼其衆出出則民兵盡  
執而置之獄俄與真入視府中見所藏諸兵器詰曰  
此將何爲也真不能答乃羈留之踰月上得奏狀繫  
真入京伏誅其有膽略知慮動合機宜類此時濠變  
方起人情詢詢以爲必取水道及南京 武廟親率  
師討之憲臣以徽爲襟喉地行在供億胥此焉辦乃  
便宜表淑知徽州報至卽出篆簿帑藏餘八千金人  
始知真清白吏也至徽止預接駕丁夫餘悉如故公

私宴然去杭踰年人思淑白當道復之臺察以聞竟  
從杭請未幾遷湖廣按察司副使尋轉布政司叅政  
銅盤嶺洞賊起淑捕之先廉獲土民爲藏匿若干人  
凡報賊者輒弗令返繇是消息不通乃令各村富民  
集兵以待麾指運用莫測分道直迫賊壘而猶不知  
月餘外給不繼賊始困又使人善諭之遂降乃下令  
官兵任取金帛籍餘資于官者數萬功上受賞會大  
饑多方講求事宜置斂散法極貧賑米次賑錢次轉  
貸節役蠲稅民多賴焉屬有腴田數百頃水決爲陂  
塘歲比不登淑白臺察出所籍銅盤洞金以資費度



本朝多省人物考 卷七十一 十一  
勢而疏導之爲斜堤植柳以遏水勢不二年田有秋  
以丁父憂服闋轉浙江按察使又丁祖憂服闋報補  
江西按察使轉浙江右布政使疾作卒年五十二事  
繼母胡克孝與其弟志及志憲怡然友愛凡先人所  
遺悉以推與志及挈其子元復輩扶柩江西藩臬諸  
司賻奠數百金悉辭不受

楊智

楊智晉江人幼有大志成化初舉進士擢南京監察  
御史因天變陳言歷數大臣之罪當黜者且及宮闈  
近幸遂賈衆怒繫詔獄將寘重刑尋以科道交章辨  
釋黜廣西布政司照磨轉化州知州卒智歷仕未久  
其志節已卓然可稱一斥不復竟死炎荒識者莫不  
悼之

李聰

李聰晉江人弘治庚戌進士授翰林院檢討充雍府  
長史改吉府聰自爲舉子時經術行義已爲士類所  
稱及輔藩王以剛正舉其職事正德初疏乞歸養家  
居杜門動遵矩度鄉士人敬重之稱曰古李先生

傅浚

傅浚南安人弘治中進士授主事丁父憂遭逆瑾密

法除名後瑾敗起工部員外進郎中敫歷中外以績著

黃瑗

黃瑗晉江人弘治中進士知長山縣時山東旱蝗瑗多方拯濟隣境饑民聞之來就食者以萬計累陞肇慶府知府以平賊功進三品秩焉

張岳

張岳福建惠安人初以進士授行人率同官諫 毅皇帝南巡杖闕下謫官 嘉靖初復職累擢廣西浙督撫治勛陽總督兩廣召改刑部尋進右都會

鎮算同仁諸苗叛詔以岳視湖廣川貴師岳度苗情謂撫守非計乃大集土漢兵檄請將分道進勦斬獲以數千計會有思州之敗詔奪一官未幾盡勦首惡龍許保等功未報而岳卒其後兵部覆上其功復右都御史贈太子少保謚襄惠賜祭葬如例

陳琛

陳琛字思獻號紫峯泉州人正德丁丑進士始授刑部主事乞爲南京戶部以便養轉南京吏部考功請告家居就家起爲貴州按察僉事調江西僉事皆督學政並辭不赴蔡虛齋之學方顯士人鮮能習其傳

而琛之生稍後自以其意爲宋儒文公朱氏之學未嘗聞虛齋之說也一日虛齋得其文於故長史李木齋所嗟異久之李曰此吾徒也虛齋瞿然曰吾乃得此人爲友足矣不敢爲之師也於是乃介李稟學於虛齋虛齋曰吾所爲發憤沉潛辛苦而僅得者以語人常不解不意子皆已自得之今且盡以付子矣於是講爲師弟子琛之書布於四方家而有之學者治經求通于朱氏微先生之書若瞽者失相從禽無虞悵悵然不知所如往士之專精自名所業以授生徒者往往爲書其卑者望先生之外藩而不見其門其高者不能以有加也故其爲書矜名立號何啻千百皆滅沒蔽塞小行而不廣暫誦而輒廢惟琛之書焯乎昭布大行而久存雖與世相弊可也今書肆所板四書淺說易經通典是也

史朝賓

史朝賓字應之號觀吾晉江人嘉靖丁未進士當肅皇帝癸丑春楊椒山繼盛以兵部郎上疏極言相嚴嵩納賂蠹國十事疏中有引二王語上大怒命杖之百下司寇獄舉朝皇皇時朝賓以員外郎署司事部堂何問當擬何律朝賓答以奏事不以實當用

此律何日更有一律可用汝試尋之次日復日以員外見只有此律他無可傳者何乃指詐傳王旨一條謂用此何如朝賓爭不可時急矣延數日獄未上何乃曰汝執誠是然 聖怒不測與其俱斃無益不若姑狗 上意以待後解左堂王嚴氏姻人曰司官欲徇名姑饒我老命於是改擬詐傳王旨絞藁成授司令署銜朝賓痛憤既不可奈何乃自署本末云楊某言雖註誤心實無他惟望 陛下憫其狂愚謫發遠戍以全好生之德數語及疏入嵩怒楊坐死司官降三級調外任由泰州判官陞楊州府通判陞南京戶

部員外尋陞郎中母憂服闋補工部郎中管張秋陞河南僉事陞尚寶少卿陞南大理寺丞應天府丞南鴻臚寺卿時文貞為元輔方欲大用未幾卒祀鄉賢祠雅尚澹泊簡約恥為時俗麗態自宦所歸僦居僧寺舍車而徒宛然寒素孝友忠信不言而躬行居官奉法循理節冗費恤民隱卻餽遺雪冤抑所至著績薦於端簡鄭曉曰表裏無間夷險一節稱於蔡巡撫汝楠林宗伯濂曰不飲大梁一滴水曰聽其言若吶吶不出口而胸中膽略有萬夫莫當之勇嘗集自古父子兄弟言行可法者為史氏內範行于家

黃傑

黃傑字一貞號忍江同安人以貢爲湖廣麻城訓導教兼父師恩義並篤嘗謂諸士子曰吾初授官時每念之不寐竊謂官以訓導名豈漫然哉字從言從川欲吾諄諄以善言與諸生相切劘也導從首從之從寸又欲首躬行以倡諸生隨其所之尺寸不可踰也居嘗分俸以贍貧士又嘗述宓子之治單父每抑競崇恬蓋感楊喬之喻云而又時時稱引其鄉先正若虛齋之操履次崖之風節淨峯之長厚其行事甚詳竟口無一庸俗譚也秩滿陞海寧教諭海寧士佩其


德建祠生祀之後以教授歸楚耿天臺周元孝皆所篤愛士也元孝督閩學政謁其廬猶儼然以師道臨之更不一語及私天臺曰覩里中諸寒士擔簦徒跣爲俯仰計良苦也歲時以無能修儀爲楚或稱貸以往候之署闈人預探有贄方報見見則盛容怒氣臨之已納贄袖中默以指度腆菲稍如意始降色相遇否則設諸難督過士逡巡不敢吐一語至貴豪子弟則又謔浪媒褻無復夷等聞黃先生之風宜媿死矣

林性之

林性之字師吾號一川晉江人自少受書於父嶢學

既有所受而精之以思多所自得其所說易中庸時  
 義自為庠生時諸經生則已遵信之如前輩人所居  
 教授常數十人僉事蕭請以為士師賓禮之僉事有  
 所屬吏以賊敗因私於性曰君脫我我厚謝君性曰  
 某書生耳知為師授弟子經他非所敢聞也其人愧  
 謝去嘉靖元年舉於鄉八年舉進士授浙江麗水縣  
 知縣三年擢南京戶部山西司主事監龍江天策諸  
 衛倉丁父憂服除改戶部浙江司主事為尚書梁材  
 所知委監龍慶古北口倉三年遷貴州司員外郎監  
 天津倉以病乞改南京遂遷南京戶部廣西司郎中

過家病卒年五十二為人恂悞質訥蕙蕙細謹世俗  
 一切鉤距機警鑿空籠罩之巧非特恥而不為亦若  
 性必不可移而為之然者其始令麗水邑故有窰課  
 後窰戶以課重徙盡則均其課於病窰之不為窰者  
 至性疏除其額凡若干會造籍時里中以窰絕自言  
 者三十餘戶吏以為無故減三十餘戶且得罪性竟  
 減之守令本以盈課額多戶口為功最而性之為令  
 益如此律令倉法最重坐者往往累死而老倉曹方  
 收粟時貪升斗之賄不擇美惡乾濕歲久溼爛輒繫  
 死不能賠死則連繫其妻子坐監龍江倉時欵欵戒



語其屬曰奈何以升斗故坐重法乎頃之適有沍爛坐罪者性輒愀然遂命發數倉粟與其沍爛者均給於軍曰此一軍所虧粟粒耳于是諸屬感泣至不忍犯法其在龍慶以爲商賈邊儲所本商賈病則粟不來粟不來則邊人坐困故一切條去其所不便高其價以招之自是粟溢於廩而性得時其出納以濟邊人之急至在天津時值倉粟空又寒凍餉道阻軍無所食卽奏請發旁近德州倉粟給天津軍三月食或謂于法不得相借不爲止已而朝廷竟從性議當是時微性一軍幾詢詢性本細謹畏事爲戶部慎出納

守尺寸法不敢失至其越法有所移用如天津時事而曲法有所寬貸如龍江倉時事抑何毅也卒祀鄉賢祠

鄭懋中

鄭懋中字靜以晉江人由郡庠陞太學領應天府丙子鄉薦擢知程鄉縣治先禮義不尚法律民謠之曰鄭懋中真長者禁令不煩徭役寡斯民相見何嬉嬉昔日無羊今有馬初程鄉民鮮知學懋中至首作新學校親爲生徒講解自是始有進士登第者一日感疾戒其子具湯沐正衣冠端坐而逝民哀慕之共昇

其喪歸葬復立像於漢令曾芳之祠而合祀焉

### 張廷芳

張廷芳晉江人世居縣南之方山父謙齋以文學召爲石井書院司糾廷芳世其業以講明理學爲務冠婚喪祭一遵朱子家禮自號退密翁嘗著易經十翼章圖蘊義十卷未上卒于家退

### 趙復

趙復字無疾號退翁晉江人隱邑之孤山博通經史不求仕進泉俗冠婚之禮率弊於侈靡喪葬之禮多壞於浮屠復惓惓以古禮爲之倡人多化之卒年九

### 十五門人號曰莊節先生

### 王慎中

王慎中字道思別號遵巖其祖由固始徙居晉江慎中生有奇質母教以詩輒記誦不忘父教以對語應答如響年十三四盡通舉子業且多讀古人書時授學於蔡虛齋高第易時中一見謂當避生三舍年十八舉嘉靖丙戌進士授戶部主事監兌通州往監兌者惟取完事不復及國家大計慎中獨急轉輸革侵耗宿弊爲之一清暇則讀五經暨百家言詩文具秦漢魏晉風骨又倣晉人作書遂擅臨池未幾改禮曹



更得一意于文事 世廟方重祀典與文制禮作樂西  
郊改建百役奔馳慎中時典祠祭督工考禮克副尚  
書之托辛卯主廣東鄉試錄文甚佳明年狀元及第  
者卽鄉魁林大欽也朝議破格用人將取部屬充館  
職諸部屬無如慎中才者權貴人欲其一見而慎中  
固不肯往曰吾寧失館職不敢失身乃改吏部慎中  
在吏部以才高事事得與謀少宰霍渭厓嘗稱之于  
衆中已進驗封郎中會忌之者短于羅峯張相國因  
以覆方士張衍慶請封事謫判常州慎中在郡能革  
吏弊得民心巡按御史郭宗臯夙重其才譽揚之而

巡撫侯位待之不少假委署江陰縣縣多大族多不  
法慎中不以遷客少偃蹇至則延見父老舉廢事除  
積害怙勢不悛者首置之法一縣肅然尋陞戶部主  
事再陞禮部員外俱畱都冷曹因得益肆力于問學  
嘗與龍溪王畿討論陽明先生之遺說而精心求之  
夙好古漢以下著作無取焉至是始讀宋儒之書而  
喜之尤喜曾王歐三氏文卽眉山兄弟猶以爲過于  
豪而失之放矣以此自信乃取舊所爲文悉焚之製  
作一以曾王爲準丙申陞山東提學僉事慨然以古  
風教爲已任章程條約爲之一新時下寮叅謁曲膝

過恭乃痛爲禁革所試卷品藻彈射百無一失其高等士率以次得雋去東人至今思之未幾進江西叅議江西乃陽明先生過化地故老猶能道其遺事慎中尋陳跡發新議往來白鹿鷺湖間與雙江聶司馬東郭鄒司成念菴羅殿撰南野歐陽宗伯交遊講習學益進俄遷河南叅政抵任禁有司不許科擾章聖梓宮過河南供億繁多下吏有棄官遁者慎中身任其役察吏咸仰賴之歲饑戶部王侍郎奉旨賑濟王檄慎中將事慎中爲親歷郡邑開倉發粟民獲更生王具以狀聞且薦當大用辛丑考察忽從中報罷偵

之乃權相夏怪其爲屬日不曲意奉承而竟坐以不謹慎中旣罷因約同罷涵江劉叅知遊淇水王屋大少二室及武當山相携而歸劉竟不從慎中因獨至淇上徜徉百泉蘇門之間訪學士崔後渠談數日而歸時年甫三十有三耳慎中少年英氣太露如太阿出匣知其難犯久之涵養深沉藏鋒斂鏘而世竟莫能用矣其爲文必反覆沈思意定而辭立就造語華瞻命意深遠片紙隻字得之者有如至寶閩士日以所業請正門墻幾不能容凡監司部使者行縣莫不造其廬講道問政居常念從仕之早不獲盡力于父

本草分省人物考 卷七十一  
母之奉故其罷也葬父養母稍無遺憾又以爲國家  
承平日久民不知兵一旦變作東南海上逋逃是爲  
大患泉固濱海且與漳隣深爲可慮建州爲八閩上  
游乃卜居焉後倭患作一如所料將遊武夷築室九  
曲深處遂躡屩至衡湘登南嶽棲息天柱回雁芙蓉  
峒嶺諸峯澄神反照爲長生久視之道復與八才子  
等一晤因母病遂已戊午夏賊自武榮入郡境市鎮  
居民扶老携幼驚逃山谷中有倡爲清野之說者督  
責入城慎中撫髀嘆曰是大失計清野乃北邊虜至  
急斂人畜使彼無所掠若內地惟在郊關外村落生  
聚然後能成治耳今宜速令各鄉大姓盡還故居相  
度地利自相團結使盜至不得逞而後城內可恃以  
爲安耳後數年卒壽止五十一

蘇士潤

蘇士潤字惟德號誠齋晉江人九歲能屬文文多驚人語同郡王遵巖以文名一代試之大加稱許少治尚書獨得其解有不拘拘于蔡傳者嘉靖戊午舉省試第三人晉江用尚書擢魁者自潤始蓋又七年而成進士爲吉水令徵入爲江西道監察御史首疏請東宮講學又疏舉遺逸以備緩急又疏裁東粵撫臣

以蘇困語皆剴切中時弊已有旨取光祿銀三十萬  
兩備內供潤杭章諫阻謂江漢之水不足塞漏卮宜  
從罷語尤峻直旋按長蘆鹺政行小票法通商利民  
至今著爲令巡按順天首劾一州牧恃輿援乾沒官  
帑者貪墨吏聞而股粟中貴人義子憑城社張車騎  
橫行都中潤廉得其黨與盡置之法不少貸自是中  
貴斂手相戒後巡視京營簡戎器練卒伍更置債帥  
營臣有懷私詭言京軍驕懦不足恃欲召募客兵以  
衛根本謂北人性勁使恩威素布訓練以時自可易  
驕懦爲精悍若棄土著而募烏合徒靡養兵之費無

益實用議竟寢在臺七年時相張江陵居正嘗欲招  
至門下潤謝不應心憾之而張故與僚少師高新鄭  
拱有郅合權璫擠高以去諸爲高媼戚故吏門生相  
繼斥謫潤新鄭乙丑所舉士因出潤爲湖廣按察副  
使仍風銓司用考察京朝官謫潤全州卒踰年量移  
湖州司理久之晉四川夔州丞後先六七年迴翔州  
郡上官多以潤自恃從要近下遷不欲煩以吏事乃  
潤一意勤修職業撫恤民隱勸農課士孜孜不倦歲  
壬午江陵物朝政更新諸爲所斥謫者或起田間或  
援自下僚有不數歲驟至通顯者而潤適以夔守缺

入覲如京師諸朝賢論潤以直道久抑共推轂潤蓋  
不久超遷有日矣入都疾作卒

周天佐

周天佐字宇弼號磧山晉江人登嘉靖乙未進士授  
戶部廣東司主事辛丑年春楊爵以監察御史上封  
事大略謂雪雨不可爲祥瑞而頌之權奸不可爲忠  
信而邇之土木之工不可不止朝講之禮不可不修  
邪說之妨政害治者不可不斥讜言之益國與民者  
不可不聽初五日械繫下獄十三日夜復蒙笞且備  
極拷掠人悚懼謂爵必死不可救延兩月餘夏四月

初九日

九廟災

天子詔百官使言時政闕失天

佐應詔上疏其略曰 陛下示人以言未若示人以  
政求言之切乃示人以言耳而御史楊爵之獄未釋  
是未示人以政也臣聞詔書且下意曠蕩之恩必首  
及楊爵今復不蒙恩宥臣展轉思之心實未安况明  
旨旣許條陳苟有所見寧忍終默國家置言官以言  
爲職楊爵所言之事豈逃睿見惟以過直犯怒誠可  
矜察而爵今在獄中已經數月且 聖怒之下一則  
曰小人一則曰囚犯以盡言極諫爲小人則爲緘默  
逢迎之君子不難也以奉直納忠爲囚犯又孰不能

為容悅寡過之臣哉言行君子之所以動天地也人君一喜一怒上帝臨之陛下試一思焉其所以怒爵而罪之者果合於天心否耶萬一爵先朝露而殞是使諍臣飲恨直士寒心爵一身之利害不足深惜而所關係聖德之損益不細也臣願察爵之疏原爵之心特賜釋放仍乞明示嘉納不吝旌爵之忠謹以風天下之直則聖德如天地之廣如日月之明由此而天意不回未之有也疏上有詔周天佐答六十下鎮撫司獄牢絕其飲食三日死題請出屍未驗屍時天晴日曠俄而雲靄橫空震雷微雨屍既出雷

已天佐妻某氏候於門外見屍出以頭觸地幾死柩寘寺無不悲痛民有張弼者祭於柩前而哭之人曰子與舊相識乎曰否吾傷公以忠諫而死是以痛之深歸葬於閩中

楊逢春

楊逢春字仁甫同安人己丑進士授仁和縣令父喪未至官服除補昆山徵入授南京道御史出為廣東按察司僉事母喪去職起復僉事為四川按察司擢河南布政司叅議積資二十四年始為雲南按察司副使未至卒年五十六居官竭心奉職崑山稱富縣



前令多以富自沒諸獻遺權力一切罷之其政寬民  
 急吏賦籍獄牒胥吏不得竄手戶受賦重輕獄當決  
 縱榜示出無不愜服不復求吏知權不在左右也撫  
 按異意條教難遵春據理疏正江南北諸郡邑以歲  
 時餽留臺為常春入臺餽不敢至曰是嘗為崑山盡  
 罷諸獻遺者不可溷也巡視江南北倉汰黜庸貪風  
 采振竦在廣東分巡嶺南兼有兵戎之寄法弛日久  
 將玩卒惰賊白日剽通道行旅梗塞春首舉綱維責  
 郡縣以修政息民之要然後易置將領選卒訓練指  
 授方略自是賊氛絕得在蜀領鹽書專以鹽屯為職

號煩劇春綜刷成額按籍考要年侵月虧瞭然可見  
 課入日進時叙州戎縣都蠻叛殺掠吏民長寧戎琪  
 一路邊無居人監司相顧莫肯發口春獨抗言且設  
 禦取之策撫按謀委春春至益用耳目知蠻敢為不  
 靖由屢撫養其驕桀之性非盡勦之後益不可為度  
 險阨分兵四路約期進勦春復計蠻素以撫徯我因  
 而誘之陽撫其四鄉而以勦二鄉為師名果得四鄉  
 最桀者四十人以來盡殲之用是兵入有功俘斬千  
 計湖廣分部潭邵之間戶多亡逃客戶据其田逋稅  
 猶責主戶之存者故亡益多而逋不可校春為法使



本朝分省人物考 卷七十一 陳元  
稅常附田以行田與稅不得相失卒於湖南民走哭  
相踵不絕

蔡貴易

蔡貴易字爾通號肖兼同安人父宗德號兼峯官台  
州別駕既以補官卒京邸母洪辛勤教成甲子舉鄉  
試戊辰第進士授揚州江都令洪卒服闋補浙崇德  
令崇德夾諸壯縣貴游結轍相望易以凝靜澹泊從  
事諸貴游無所加初至諸里甲以供應器物進甚腆  
易却曰吾起家措大一官如寄耳麾而退蔡邑民故  
苦差徭強有力者爭倚豪右爲藪不得差而易著畫

一法貧富適均民至今便之邑有大盜聚衆倡亂聲  
息洶洶諸使者欲兵之易曰察諸亂民皆脇之而往  
者亂非其本志此可折筭使耳用計擒其渠魁餘黨  
盡散全活甚衆晉南戶部主事管京倉以言者鐫一  
秩不補竟飄然而歸

郭楠

郭楠字世重晉江人正德九年進士由浦江知縣選  
貴州道御史嘉靖元年巡按順天議大禮詔賜廷杖  
罷歸六年起補吉水縣教諭累陞南康知府疏乞致  
仕以歸



丘養浩

丘養浩字以義晉江人正德十六年進士由餘姚知縣選授浙江道御史侃直不避疏斥權倖當塗擠之謫永平府推官尋復職巡視兩關督學南畿所在咸舉其職陞南大理寺丞累陞右僉都巡撫四川江西一時才望重於朝野未幾疏致仕而歸

李源

李源字士達號竹坡晉江人乙丑進士奉使廣東督發稽畱諸賦故事藩司以使事至者贈遺至百餘金而使者以藩司官尊逡巡不敢卻源一無所取藩司

購陳白沙字書四幅爲贖拜而受之使還除戶部主政差監臨清倉倉故置中貴一人董視之往與諸吏徒甲保乾沒爲奸利事憚源嚴恪治酒饌爲好冀以娛源當席舉杯沾唇而已中貴人斂手不敢恣者終一歲恚恨無所發則構趙副使侵撓倉事擾吏徒源疏其事以聞并劾中貴人罪狀事下戶部尚書孫公九峰歎爲得職每舉其官氏稱于曹中以勵屬員久之逆瑾竊權脩前憾遣轉餉遼左故縮其期欲陰以中之時天寒雪深數尺晝夜行雪中二百里竣其事以報瑾不能加也然常恐其禍及託以終養竟疏請

本朝分省人物考 卷之十一 二十九  
得歸是時瑾毒尚未談 孝宗之遺澤尚存士大夫  
習乎晏熙高重不樂去職故于其歸也人咸咨歎以  
爲難源歸而母正患脾善怒寡歡笑乃制爲軟輿自  
與莊獲人舁之游嬉室中素有足疾蹙蹙然行也女  
侍爭走代之曰非爲乏使欲以用勞爲小孝耳且吾  
自勝之不爲苦也後瑾敗連以原官起用不赴又以  
南京文選郎就家起之亦不赴久之遷拜尚寶司少  
卿適丁外艱衰經未除而一疾不能起矣居以文史  
自娛宅近市廛庭戶蕭寂門無雜賓病足不喜出遊  
兀然一室焚香展卷正襟而坐俯仰千古之上平生  
不御絲竹與人談有及物價市利羸縮低昂之說卽  
口塞似不能言至于陳說理道揚摧風雅疊疊有韻  
致聽者灑然忘倦爲文雄偉奧健其所獨得每斲破  
規矩自爲方負故銘幽記遠之文著述獨廣郡邑大  
夫欽慕德履承風致敬旬月必一造其廬然終不以  
他事相溷也起家爲進士凡三十六年有田百畝宅  
一區皆先人所遺後宅燬于火久不能興竄伏草莽  
瓦礫而寓其孥於戚里郡侯王公士俊蹙然嘆曰及  
吾爲守而使賢者無以庇其身吾之愧也議損貲助  
之于是僅成堂數楹而房寢庖廡竟不能具歿之日

本朝分省人物考 卷二十一 三十一  
無以爲殮稱貸于人始克成禮鬻田而葬諸子常不免于饑何其貧也抑無愧于古之節廉純孝矣

蘇志仁

蘇志仁字道先泉州人宋子頌之裔也生而氣宇清瑩穎敏絕倫幼偕羣兒遊里社中或言社中有鬼祟者羣兒驚走屹不爲動或怪問之曰鬼之於幽猶人之於明也何畏乎識者器之嘉靖甲辰成進士除池州府推官爲司理者多以搏擊爲能而獨持之以寬當庭讞時每從容陳說理道喻以至情恒多感泣搏穎願罷去者適寧國缺守憲臣檄之署篆至則一意

鎮靜休養有加時有僞爲楚王世子東游者所至張赫抵寧拒不與見也潛使人言於王曰祖制王者非君命無出境大夫不越鄉而交今大王世子不厭風露而徧臨四境惟王圖之王報曰僞也寡人子安得爲此乃擒而送之楚當道壯其膽智秩滿徵拜銓司歷陞文選員外郎久之因與李司封論事尚書前過訐直尚書怒竟坐降級補外得運判兩浙尋移興化同知轉江西按察僉事未至以疾卒于家志仁於書無所不讀而尤精于天文律曆之學下至金石彝鼎之文山川草木蟲魚之細靡不畢究所著有抱拙

堂稿及日記存疑諸書類多遺世獨立之意而實根極理道歸其本於正故其文類皆可傳者

詹寅

詹寅字敬之泉州人生而穎異秀拔少卽具有成人之志其讀書務尋大義不屑屑爲經生之訓詁嘗私識其語于書舍曰讀聖賢書須繪出忠肝義膽友今古士要煉就鐵骨剛腸識者已知異日定以身負天下之重任矣久之成進士選授行人會武宗巡幸無度權宦江彬錢寧等竊叢神以爲祟假神虎以冒威所過無不荼毒者將北巡戒行有日各部及翰林

院具疏列名詣闕下伏留甚懇上震怒罰跪門五日已而行人司繼之大理司繼之上益怒繼疏者盡褫其衣冠梏械手足下于獄命杖于獄中越五日又杖之闕下時死者七人而寅其一焉血肉淋漓棺衾不給凡見聞者靡不哽咽慘裂淚淫淫被于頰也時長安同志者共相賻助始克歸葬而妻子瑣尾不堪之狀極矣至嘉靖初元錄贈死事言官乃得蒙恩贈監察御史賜之祭錄一子入太學後爲光祿寺丞

陳讓

陳讓字原禮晉江縣人嘉靖間進士由紹興推官選  
浙江道御史以建言罷職疏薦復起御史尋建言罷  
歸天下靡不高其直歷久挫而不少降也隆慶元年  
詔贈光祿少卿

### 黃駟

黃駟字珍夫安溪人爲邑弟子時每抵掌顧同舍生  
丈夫一日立玉陛前抉腎腸與人主爭萬世大計安  
能局促效轍下駟爲舉鄉薦久困公車最後謁選爲  
温州丞駟生平於進退取予析義至秋毫曰毋以纖  
微自恕也其丞温州先後六歲而車門絕苞苴丞職

在戎政則日夜繕城郭清什伍修戰艦嘗慨然以爲  
憂曰賊耽耽吾溫柰何以烏合衆當之則又慷慨自  
矢曰丈夫卽死死職耳且吾髮種種生詎幾而愛之  
吾腹有丹者寸在蓋嘗書之楣間以識云又三年倭  
大舉犯溫兵使者檄駟出逆之人或謂嬰城易堅耳  
曰四郭外非吾民也耶而以委虜速逆之當是時溫  
軍分而三駟所將獨中軍其二軍帥皆乳袴子一軍  
軍壘石一軍軍鐵場以爲後援駟軍前薄於賊勁弩  
巨礮雷發賊稍稍辟易僅能成軍而賊陰分其衆爲  
二一從上流掩壘石一從下流掩鐵場其帥皆奔其

軍以走賊合而尾之馴軍腹背受敵遂大潰馴爲賊  
所得坐榕樹下而脅之降叱曰世寧有降黃大夫哉  
賊復好謂我歸大夫予我千金嫚罵曰生黃大夫不  
一金值也賊怒裸而寸斬之後賊退其婦林宜人行  
購屍已糜覓之不獲與其嗣子文燁具衣冠招魂葬  
于邑之沿江里白沙丘朝廷憫其忠特贈浙江布政  
司右參議錄一子太學下有司建專祠復祀於名宦  
詹仰庇

詹仰庇字汝欽安溪人嘉靖間進士由南海知縣選  
授御史建言 廷杖罷爲民萬曆元年起陞參議累

刑部右侍郎疏請致仕以歸

### 蕭騰鳳

蕭騰鳳晉江人隆慶戊辰進士初受南海令當巨寇  
曾一本煽亂之後邑里蕭條添設撫臣增兵置餉百  
務劬勩而督鎮叅隨客兵以千計皆雜處省城恣睢  
爲梗騰鳳明而能斷經畫調劑皆有方上下稱便催  
科則耗餘不入聽訟則兩造得情人心悅服獨以同  
鄉人爲郡守坐事註累遂左遷郡丞去衆共惜之後  
歷官至運使卒有才名善書黃體

### 李廷機

本朝分省人物考

卷七十一

三四

福建二

李廷機字爾張號九我晉江人幼稟氣薄就塾後猶  
夜啼筋浮睛露鄉父老謂非壽相父母亦憂之然沉  
靜寡言永日不思睡十一歲從黃默堂先生一日以  
狀元宰相命題破曰名魁天下之選身近天子之光  
先生喜甚命同學北面揖之蓋是時已能誦詩書禮  
記三經矣戊午以儒士應試補郡庠生辛酉倭亂鄉  
試後喪父癸亥喪母因取蓼莪之章號九我丁卯蔡  
見麓先生督學試高等補廩是年 穆宗皇帝登極  
戊辰選恩貢己巳卒業太學大司成餘姚孫公少司  
成同州馬文莊公咸以遠大器之庚午舉順天鄉試

第一自念一領鄉書輒事干謁爲生計古人謂餓死  
事極小失節事極大豈澹臺子羽不可爲耶因家永  
春深山中往居焉山中米賤蔬笋不鬻而有但不能  
具肉陋室蕭然不蔽風雨一友人經過憐而謂曰郡  
中儘可度日何自苦乃爾笑而不答癸未蘇紫溪公  
以工部分考卷冠其房四明余相公新安許相公拔  
寘第一 殿試第二授翰林院編修丙戌殿試克掌  
卷官夏持節封趙藩過家置義田贍族人葺先塋葬  
族人友人不能葬者丁亥還朝授小內侍書戊子編  
纂六曹章奏己丑分考禮闈得陶望齡等二十二人

殿試仍克掌卷官管理 誥勅壬辰九月秋滿陞侍  
讀改右春坊右中允兼修撰管理清黃癸巳陞司經  
局洗馬仍兼修撰掌局事甲午 皇長子出閣克侍  
班官改右諭德掌坊事秋典應天試還克正史纂修  
官時 豫教方勤秉燭講讀每四鼓呼長安門入寒  
暑風雨不輟乙未陞左庶子兼侍讀掌坊事經筵克  
講官秋典武試丙申陞祭酒謂今之教人者不近守  
高皇帝整齊嚴肅之法而輒遠引敷教在寬之文  
夫所謂寬者乃多方勞來輔翼欲其自得之謂豈以  
縱弛爲寬哉故教一以整齊嚴肅爲主拜與有節課

講有程差撥必公曠壓不貸而又以膳饌之餘葺文  
廟垣屋修補供具祭器葺官號房射圃又於圃中隙  
地植槐柳桃李梅杏數百株丁酉陞少詹事兼侍讀  
學士克正史副總裁六月陞南京吏部右侍郎署部  
事主京察公忠詳慎事事不忽攝戶工部盡革闔京  
舖行立水兌八規刊糧解單以杜橫索成山伯壩官  
河養魚民苦水腐不可食克成山決之浙人李文政  
流寓南京以交結貽籍京人告御史筦城者置之法  
葺外羅城一百三十里歲歲省水衡萬餘金葺 孝  
陵周垣五十里葺皇城直房公署廟祠牌坊橋梁飯



堂皆取諸節縮奇羨皮置無用之貲未嘗動帑一緡  
三年給由改禮部左侍郎兼侍讀學士四疏辭不允  
有旨敦趣癸卯七月入京署部事是時歸德四明兩  
相公不協會楚事四明又與江夏左江夏訐四明遂  
成郟至江夏引疾去守旨楊村妖書起言官因借以  
傾歸德至逮江夏會訊獨以身翼護之時皦生光佐  
驗甚明已承伏衆猶不決曰此事不決縉紳荼毒矣  
于會稿職名下直署情真二字衆署情真者十之九  
稿進于 上獄乃決當皦生光之已承伏也更嚴拷  
訊令供同謀主名又詔責會問官有朋友情深君臣

義薄之語諸人承望風指首鼠持兩端江夏危甚因  
約詞林四五公求救於四明而歸德之門無敢至者  
獨數往候之或語曰人皆集於苑爾獨集於枯勿顧  
也甲辰知貢舉充日講官署部四年立簡便之法以  
便宗藩飭 殿試之規以閑進士定 廷試之期以  
便歲貢行歲考革彙考以便孤寒革紙戶舖行以便  
民剗屋以居官施衲衣以活凍丐一切公文查覈題  
覆投領轉發不越日而其大者莫如王府卽遠年枉  
抑有訴立查立定奪出示人得面盡無阻格停滯之  
難諸宗知其如此遂不賄求胥吏及中官費大省貧

宗便之在部常不欲遷恐所興革不能久故吏部擬推少宰力辭既滿六年疏南北治狀請加尚書疏辭山陰相公謂可加太子賓客曰侍讀學士不佳却要太子賓客耶山陰笑曰如公足以風末俗矣久之上亦浸聞甲辰朝覲上於禁中語左右曰此時京官正忙惟趙世卿李廷機此兩人閒不與外吏接也丙午得旨褒以忠慎恭勤又劄諭內閣有朕知其清謹之語丁未上特命以禮部尚書兼東閣大學士入閣辦事謝恩疏言人臣惟知有主苟可自致於主者無不盡有益於主者無不爲不知有身不知有家不知有交游往來不知有毀譽得喪必無一念不可與主知必無一事不可對主言以是內省有不可則止之訓在焉人教之進言建言急收拾人心曰天下事平平做去天下路慢慢行去要急却緩要好却不好要明白却不明白美必歸君入告之語必不外傳雅慕清淨畫一之理欲省議論明職掌母相軼越守令甲毋動論官曰勤事論人曰躬行論大臣曰擔當論相道曰廓然大公物來順應曰行所無事論用人曰中材最多惟恕以用之至論邊事則曰不可爲問其故曰苞苴可絕虜請託可杜虜由今之道

無變今之俗而欲將勇兵強餉足不可得也既入閣  
四方書揭俱于長安門外投領無有至其私門者在  
事九月主張四川撤兵全活黔蜀生靈省餽運處撫  
安疆臣兄弟不至爲播州之續謂北地營田可聽民  
自營官勿預山東故有海道通遼可轉粟給軍南京  
鑄錢利厚可廣鑄北輸濟工折俸商人苦累可查正  
德初年牌甲法編銀備役間以折色濟之會有煩言  
遂決意乞身自戊申四月後屢疏屢慰不出再遣鴻  
臚寺卿宣諭不出命同官諭不出聖節不出閣  
事不聞邸報不閱言者蠶湧不辯已酉冬移之真武

廟居焉人曰褻矣曰席藁也或曰荒涼曰固安之或  
曰子未可以去乎必去必待命去耳暇中續成春  
秋日講考永樂迄隆慶實錄所載閣臣爲皇明閣史  
纂國朝名臣言行錄編宋賢事彙剛通鑑性理書著  
四書臆說家禮家訓仕蹟如干卷壬子二月返故邸  
上遣中使諭少俟過萬壽聖節疏請辭朝上猶不  
欲去旬日之內遣中使諭畱者三遣鴻臚卿者二又  
浹旬乃辭朝上乃允加太子太保予銀幣馳傳遣  
官護行恩數優渥而尚責中璫不邀畱怪其急去猶  
若不釋然者人以爲殊常之眷殆二十年來所未有

云平居言論動稱古人在詞林惟禮節事體咨前輩  
至行已居官則曰擇善而從可也秀才時館於何憲  
副小洛公家見公自道居官朝叅之勤心識之故仕  
宦三十年不敢以憚勞養安失禮怠事嘗言無故不  
朝叅公座律當笞君子懷刑烏可犯焉攝南工時有  
縉紳過謂公翰林官顧肯親俗事乎曰有俗人無俗  
事天下國事何言俗也居恒喜誦羔羊之詩而玩其  
序所謂節儉正直者以爲正直必出於節儉每語家  
人曰士大夫恥言治生然不可不治生夫治生非委  
瑣齷齪慳吝自封殖之謂不過節用耳翰苑坦途第

覺官之美而遷之驟未嘗以一差一缺囁嚅當道之  
前不能諛人亦不能毀人事可告人私書可示人或  
言人過失曰未必然或告以某人怪子曰渠與余善  
不怪平生操無心之道以遊於世人亦多亮之者嘗  
言士大夫壯而行老而休乘流則逝遇坎則止又云  
時非漢室才謝孔明何必死而後已哉故出處之際  
不謀於人隨時據理行其心之所安而已平日兢兢  
於所投狀揭未嘗經目曰則有司存交際辭受一介  
必嚴有問者應曰上不敢負 聖主之知下不欲改  
平生之節也歸之明日卽爲亡弟襄葬飭先墳治首

丘築筍江舊廬營菴亭童子時讀書處也又修朱文  
公祠及王悔溪真西山與衛民祠產業寡而授受明  
賦無愆期其產猶在他戶代輸來索者應之不踰晷  
無山蕩海蕩軍田官田寺田寺房管社管渡之事於  
人無爭於官府無求事省心間眠食外無別念常言  
民之質矣日用飲食穿衣喫飯夜眠曉起便是道便  
是仙佛哀人窮急于明見義急于舉有義舉則急于  
助未嘗以無自解也以疾卒祭葬贈謚咸如制而加  
渥焉

補遺

謝璉

謝璉安溪人宣德丁未探花穎異絕人子史百家過  
目輒成誦除翰林編脩纂述數千百言務在不詭  
俗好嘗言史官之得失係天下之是非一時之褒貶  
關萬世之榮辱時有權貴人干以私璉廷諍之不爲  
諱嘗脩宣宗實錄大明會典聖鑒日曆諸書會灾  
異屢見璉請出官人又請赦諸無辜除連坐法遷侍  
講進經筵上御彛倫殿命坐講經俯聽甚悅嘗舉  
政要一十五事名曰直言治平策反覆萬餘言皆裨  
實用策上同天子稱異次第舉行陞戶部侍郎會太

學士高穀同年友也意欲推穀璉謝絕之竟未嘗以尺素通問端嚴正直最有大臣風 上方柄用不幸卒于官


陳道基

陳道基字以忠晉江人進士嘉靖二十九年知嘉善性簡易不立崖岸與人語煦煦惟恐傷之屏苛剔煩御下以寬三年未嘗入一重辟囹圄幾空然又謂巨奸不去善良之蠹也初下車悉籍里中惡少嚴刑苛校重困辱之仍書名申明亭有犯必懲是以刑寬而政不弛故事日輪里長一人供役煩簡不均偶值多

事所費不貲因酌一年公用之數通融計派貯銀于庫細戶有逋負鬻妻孥以償者輒為代補間有窮民困迫無聊入縣請借公用餘銀以自活道基隨數給之民亦無一負者上下相信懽如一家又擇士之有志者聯文會躬為校閱梓其文以傳召去民泣陳亦泣至今邑中村農埜婦皆知有陳侯而祠祀之

蘇濬


蘇濬號紫谿晉江人發解癸酉丁丑中會試授南刑部主事丁憂復除工部選禮部員外陞浙江提學僉事管乙酉戊子兩科一時甄收率多名士而浙之文



體亦翕然不變巳丑陞陝西叅議廣西副使癸巳陞  
本省叅政又陞貴州按察使准致仕濬以能文為海  
內重又以知文為海內重癸未榜首李廷機其首取  
士也而丁未榜首施鳳來亦其首校之諸生中者他  
所識拔多取魁元槩難枚舉身歿之後地方採公論  
與蔡虛齋並祀則又不直以文章顯也

楊道賓

楊道賓號荆岩晉江人萬曆丙戌一甲第二名授編  
脩歷官禮部右侍郎尋轉左兼侍讀學士未幾卒于  
官道賓丁酉典試浙江庚子典試順天一時甄收多  
知名士文體亦為一變其人大雅不群素留心經濟  
而不急急于功名屹然負公輔之望惜未竟其施云



人物考卷之七十二目錄

福建建寧府

劉榮

鄭賜

蘇庠

余應

楊伯安

張矩

丘錫

楊壽夫

藍智

吳瑾

方直

徐奇

丁顯

江鐵

張珂

雷填

朱泗



劉童

楊榮

雷境

杜琮

潘賜

雷璉

黃童

張崇

江禎

黃仲芳

黃福

楊誠

葉彬

吳廷用

林順

余畝

連均

陳榮

張添保

張善

范忠

鄭以誠

陳遜

田忠

裴旻

雷吉生

雷潛

吳智

龔貴

滕員

劉福

詹滌

蘇鐺

張獻

龔沅

吳浩

江沂

吳文元

康太和

徐彪

彭大僖

滕康

吳義

趙文熙

魏祖忠

黃賓

蘇鉦

徐驥

楊旦

雷

雷吉

雷

雷

雷

雷

雷

雷

雷

雷

本朝分省人物考卷之七十二

福建建寧府

鄭賜

鄭賜字彥嘉建寧人洪武甲子以易經領鄉薦明年舉進士拜監察御史時天下郡邑吏多以汚冒獲戾逮繫無虛日朝廷宥遣戍邊特命賜於龍江編次行伍值暑甚召諸械者諭以主上恩意開示大信脫其械俾各僦居止息每日一一來見衆感悅如期無敢後其有疾病羸弱者日蠲祿米具饘粥湯藥以給之獅子山有道士某僧某見曰鄭御史法官也能惠施

陶安


若此於是相率出資設行庖為飲食諸成徒賴以全  
活者甚眾道路往來困乏之人亦獲其濟皆嘆曰此  
鄭公惠也秩滿陞湖廣右叅議始至諸曹吏驕蹇奢  
縱召立庭下訓飭而約束之吏斂手不敢為非多考  
滿擢用為材官者於是咸感賜之德諸峒苗獠反側  
不常鄰境郡縣數被侵毒賜召其會長布告恩威結  
以信義寬其徭賦諸酋感激拜謝誓不再為惡鄰境  
之民悉得安堵轉北平布政司右叅議 成祖時在  
藩國賜服事惟謹尤被眷愛復以事相連謫置安東  
屯行次冀北山谷間父老數十輩拜於路曰吾儕小

人仰盛德者久矣今獲一見幸甚各載壺漿相迎勞  
又携鈔千貫來獻賜力拒不納遂行未幾拔為工部  
尚書 上卽位轉刑部尚書賜內廐名馬踰數日以  
憂懇請去位 上初政圖任舊人勉留賜乃止每日  
出則正衣冠視事夕入則易服就位哭奠如儀永樂  
三年遷禮部尚書凡朝會祭祀貢獻禮儀叅酌準式  
質文彬彬奏議詳雅人誦其能嘗病暑 上數遣人  
賜藥物有詔命儒臣纂修永樂大典賜實監之接士  
有禮御下有恩以寬廉平直聞於天下號稱名臣永  
樂六年卒

蘇庠

蘇庠字伯厚建安人自幼以聰敏聞比長博通經史尤精毛詩為文章援筆立就聲譽日起庠益自澆晦篤意事親講學絕跡不至城府國初以經明行修薦至京師以親老辭歸闕館授徒誘掖學者多所造就洪武乙丑郡辟為本學教授周斌勉之曰既仕不離鄉又得祿養親不宜辭庠從之居學校十餘年啟迪作興之功尤多內外艱闕來朝授晉府伴讀與修太祖高皇帝實錄尋陞翰林侍書纂修永樂大典為總裁明年陞檢討常進講文華殿敷說稱旨甚見禮

遇兩與考禮部會試簡拔多佳士耿介負才氣勇於為義方為教授時學地舊為軍衛所侵力復之文先生祠在府廨內難於謁祭倡率出貲葺祠於學宮傍歲時朔旦拜謁復修孔子廟及宸奎尊經二閣數月百廢具舉在翰林幾十年絕無私謁禮部尚書鄭公賜有師友之舊未嘗一至其門鄭公常請見必規以正言每加敬服其餘諸生或仕於朝或為守令者會次輒加誨諭故出其門者咸操守有品人有一善稱之不絕于口對同寮詞氣溫和罕失色於人居家有禮法服用儉約自號曰履素



余應

余應字則亮政和人蚤從江稚志遊以私淑文公之學性凝重寡言笑恒以禮自律家邇闈闔足跡未嘗入縣門蚤失所恃事繼母愉而婉處繼母弟順而友凡飲食衣服必先弟而後及也洪武初以明經薦起爲儒學訓導遷留守司知事執父喪一遵文公家禮不用緇黃

楊伯安

楊伯安字文思建安人性敏能文早喪父事母孝尤篤友于之義洪武初有司嘗以人材薦伯安以母老不就兄伯祥應斗役虧糧罪當死伯安請于母曰兄無嗣而不肖有子可以代兄死母泣然其請卽詣獄被械者歲餘臨決日忽遇恩宥乃得還

張矩

張矩字孟方其先廣陵人父伯巖爲五夫巡檢家焉矩依屏山劉子翬家得其遺書而讀之遂通五經大旨洪武初薦授儒學訓導諸生從者隨其資質高下各有所得所作經義明白簡切一時學者宗之

丘錫

丘錫字永錫崇安人領洪武己卯鄉薦蒞事工科自

陳願受學職除衡州教授永樂四年預修永樂大典  
改衢州教授宣德七年又預修 太宗皇帝實錄書  
成仍乞學職改建昌教授陞正九品秩自筮仕以來  
凡典文衡者五人咸稱其公明性尤嗜學致任猶手  
不釋卷卒年八十有八

楊壽夫

楊壽夫名松以字行建安人洪武辛巳郡守芮麟薦  
授縣學訓導秩滿諸生請留遂陞本學教諭歷二十  
餘年多所造就凡考典鄉試者五會試者二宣德中  
少師楊士奇輩交章薦之陞翰林編修預修 宣廟  
實錄陞修撰正統中致仕卒於家

藍智

藍智字明之崇安人元季從三山林泉生學春秋又  
從杜清碧學詩洪武十一年以明經薦拜廣西按察  
司僉事廉惠之聲著于一道有藍澗集兄靜之元季  
爲武夷山長亦學詩於清碧有藍山集

吳瑾

吳瑾字士瑜政和人洪武間由國子生授直隸常州  
府推官發囚訊問務推誠意使自引咎甘服不事拷  
掠及得其情惻然哀矜之意見於辭色在官六年獄

訟幾息廉恕之聲動于畿輔及再考以疾卒于京柩過常州郡民爭先哭祭

方直

方直字孟周崇安人洪武間由學諸生授萍鄉縣典史改豐城縣以廉能著稱繼入文淵閣纂修陞知縣海寧縣改新鄉縣尋以當道薦為監察御史頗有風裁後以不避權勢見沮出知新喻縣致仕卒

徐奇

徐奇浦城人洪武中由鄉舉歷官戶科都給事中物論重之陞廣東右布政使能聲益著方擬遷擢卒於

官

丁顯

丁顯建陽人博通經史洪武乙丑進士第一授翰林院修撰國朝狀元及第自顯始顯才華炳奕內行修謹人咸謂不負其科名

江鐵

江鐵建安人永樂中登進士第選翰林庶吉士尋擢監察御史得風憲體人憚其威累官廣東布政卒于

官

張珂

張珂



張珂建安人永樂中進士擢行人歷遷吏部郎中練  
達老成銓司甚倚重之尋陞浙江布政司左參政以  
廉惠著稱致仕卒于家  
雷填不樂中進士  
雷填建安人由進士授給事中彈劾不避權勢嘗被  
命巡撫蘇浙常等府暮歲封章凡四十上皆切時弊  
又嘗巡撫廣西利害所當興革悉疏以聞夷民懷服  
卒于官囊無寸帛惟澣衣半篋詩文奏稿而已

朱泗

朱泗建安人熹八世孫領永樂甲午鄉薦除直隸壽  
州判官改徐州值歲災饑泗留本州京運以賑民而  
後申白民多所全活

劉童

劉童建陽人永樂中進士知湖廣寧遠縣廉能著聞  
觀風者薦其才略出羣以嘗忤時相事竟寢歷陞蒙  
化州知州致仕卒童號稱循吏特以鯁直不屈遂至  
坎坷終其身

楊榮

楊榮字勉仁建安縣人天資英異初名子榮鄉薦魁  
八閩革除庚辰登進士入翰林院爲編修  
文帝履



極更其名榮簡入內閣初入閣之臣七人惟榮齒最少最警悟一日晚寧夏報被圍上急召解縉等七人皆已出惟榮赴命上不懌示以奏曰爾後進寧解此今當遣何處兵往救榮曰不須救臣嘗奉使至彼其城堅且人皆習戰今發已十餘日虜必退但勅守臣固守及鄰近諸城堡隄備可矣不必遣兵重爲煩擾也○夜半虜圍解報至詰旦上詔榮以報書示之諭曰何料敵之審也吉安鄉民嘯聚先遣行人許子謨齋勅撫諭行將一月又遣都督韓觀統兵繼之至是江西三司奏言嘯聚者悉已復業上命榮

降勅褒觀對曰計發奏之日觀尚在中道耳未足褒從之自是信任益重時四方事務方殷榮與解縉等七人旦夕侍左右承顧受旨退治職務且兼稽古纂述之事不虛寸晷上時步閣中親閱其所治咸稱旨進官修撰數月復進侍講二年立皇太子陞右春坊右諭德仍兼侍講成祖嘗謂榮曰恒情保初易保終難朕固常思保全之道爾亦宜益謹厥終庶兩盡其美因賜象笏幘頭公服尋賜二品金紵絲衣以示旌異三年秋召榮評議諸司事宜以奏對稱旨賜二品金織紗羅衣及鈔幣五年奉命往甘肅規畫

軍務所過覽山川形勢察軍民休戚閱城堡虛實七月回京奏對武英殿時盛暑命取瓜親剖賜榮且遣中官賜以羊酒勅命休息尋陞奉議大夫右庶子仍兼侍講六年聞父訃告歸命馳傳以往既襄事乃檢鄉黨平日有假貸錢穀弗能償者悉焚其券族人有喪不能舉者悉爲葬之孤弱不能自存悉收養嫁娶之有因產業致爭者割已業畀之詔奪情起復宗戚鄉鄰送行者咸垂涕去抵京未閱月命榮等輔導皇長孫七年榮聞母訃當去職時車駕將幸北京特留扈從賜錦衣狐裘鞍馬三月抵京賜宴榮辭以

母憂弗與特命中官以珍饌送至家七月甘肅總兵官都督何福言韃靼脫脫不花王等各率部落來歸往甘肅與福經畫還奏稱旨復命持節經寧夏與寧陽伯陳懋規畫邊務旣還至甘州福盛陳餽遺一無所取還京復命陳邊境便宜十事上嘉納之賜以襲衣鈔幣八年從征北虜成祖度野狐嶺至山巔召學士胡廣及榮指示山川形勢三月車駕蚤發凌霄峰榮與胡廣金幼孜金純四人失道成祖命中官二人及傳令者追尋得之時已昏黑中官疾馳去榮等復迷入窮谷中幼孜墜馬胡廣金純不顧而

去榮下馬爲整鞍轡不數步幼孜復墜馬鞍盡裂榮卽以所乘馬讓之自乘孱馬從夜至旦方望見左掖趨赴之至午詣中軍成祖大喜慰問良久嘉榮之義復笑語幼孜曰此中多狼汝非楊榮詎能免乎榮謝曰僚友之分誼所當然成祖曰胡廣豈非僚友耶何不顧而去也五月車駕至驢駒河駐蹕河上親選勇士三百人專令衛護不以隸諸將特命榮掌之胡寇平班師軍士乏食榮力言卽日召乏糧者赴中軍以御膳所儲糧炒散與之且下令軍中凡糧炒多者許假貸回京倍酬其值由是獲全者衆七月

至開平中途召榮還南京計事十月扈駕南旋九年乞奔母喪賜白金鈔幣遣中官宋成伴送且勅速來抵家拜謁墓下如初喪還京成祖召問閩中民情暨歲豐歉榮條對詳實九月皇太子命侍諸皇孫讀書文華後殿榮每進講罷必從容以正心崇德親賢去邪尚儉戒逸之言進深見嘉納或訪以政務必陳其切要及先後緩急施行之序皆懇切無少避忌皇太子每稱其忠直十月重修高皇帝實錄命爲總裁十年甘肅守將西寧侯宋琥言叛寇老的罕等將爲邊患勅守陝西豐城侯李彬討之仍命榮

往經略榮還具言戎狄豺狼叛服常態不足以勤大  
 軍遂勅彬旋師叛者尋附十一年復扈 駕幸北京  
 十二年三月扈征瓦剌時 皇太孫侍行 成祖諭  
 以營中稍閒卽以經史講說庶知古今成敗得失之  
 迹可以鑑戒榮每遇駐營伺間進講 皇太孫甚嘉  
 重之四月駐蹕興和以尚寶司乏人命榮兼掌其事  
 凡出號令與宣傳之事勅旨旗牌不得榮奏允不敢  
 發乙卯師次大石鎮晚涼 成祖坐御幄中召問足  
 食足兵之策榮對宜擇將帥力屯田將得人則軍士  
 弗擾軍士安則耕不違時不患兵食不足 上是其

言秋八月還北京十一月命舉朝臣及在外教官有  
 文學者同修性理大全開館於東華門外諭榮使總  
 其事書成命宴於禮部并賜鈔幣十四年陞翰林院  
 學士仍兼春坊庶子十月扈 駕南還十五年 駕  
 復幸北京屢召問民情榮悉以實對賜白金鈔幣十  
 六年五月朔進 太祖高皇帝實錄 成祖御奉天  
 殿受之披閱良久嘉獎再四會學士胡廣歿榮掌翰  
 林院事 成祖注意益隆而榮在衆中詞色嚴厲諸  
 大臣往往忌嫉陰欲疎之屬北京國子監乏師因薦  
 榮可爲祭酒 成祖曰吾固知其可汝但求可以代

之者於是衆意銷阻六月詔修天下郡邑志命榮總  
之十七年進言十事皆指斥五府六部三法司積弊  
成祖覽而喜之密與榮曰實切時病但汝爲心腹  
之臣若進此言恐羣臣益相猜疑不若使慎密御史  
言之於是得監察御史鄧真俾入奏衆皆股栗免冠  
請罪詔諸司卽日俊改怙終者不赦凡所改皆益國  
利民之事十八年陞文淵閣大學士兼翰林院學士  
特賜宴於禮部先是成祖以四夷諸番字中國宜  
解其義因選大學生習之諸生多不欲輒生謗議  
上怒將罪之榮力救得免遂命榮掌之榮訓勵得宜

自是帖服不敢妄有所言率皆有成十九年正月北  
京宮殿成初御朝賀成祖於榮特密加賞賚他人  
弗與焉四月奉天華蓋謹身三殿灾火勢猛烈奉天  
門東偏切近密閣榮奮身直入麾衛士三百人將御  
書圖籍并積歲制勅文書昇至東華門河次成祖  
嘉之賜銀酒杯古銅器各一事鈔千錠壬寅降勅訪  
求民隱榮首陳利國便民十餘事上嘉納命悉入  
詔條頒行之時翰林侍讀李時勉等十餘人爲飛言  
所中成祖怒欲罪之榮力解得免是冬逮戶部尚  
書夏原吉等下獄禮部尚書呂震侍左右屢言夏原

吉儉邪誣罔。上益怒。一日御鷹坊司特召問原吉等平昔所爲。榮極言其無他。上怒稍釋。寘而不問。二十年三月從征沙漠。每軍中命公侯大臣議機務。密令榮參決。無不稱旨。特召榮於御幄中。同公侯大臣坐飲。凡有賜賚。榮與之俱。其特賜榮者。公侯或不與。而諸扈從文臣亦皆弗與。秋八月還京師。九月宴隨征將士。命榮坐前列。食上殺賜鈔幣。并二品金織襲衣靴襪。閏十二月詔復西征。方以士馬糧餉爲艱。有以建文間江西聚集民兵與餽運丁夫十餘萬可徵用爲言者。榮曰。此兵昔有詔令復業。今復徵之。是

失信也。成祖笑語。榮曰。卿言正合朕意。遂寢。其奏二十一年秋。扈從征西。駐師萬全。一應軍務悉命榮掌之。自晝至夜。或三接宣詔。每以楊學士稱之。而不名。冬十月寧陽侯陳懋奏番王也先土干款。命榮往大同議納降之禮。回營奏對稱旨。賜以御饌。慰勞甚至。冬十一月旋師。明年三月復征北虜。五月榮言軍士勞苦。宜遣使諭胡虜。釋其不順之罪。成祖遂勅中官及所護諜者往虜中。諭其部落來歸。遂班師。會巡按浙江御史王復奏處州麗水建寧政和山寇周叔光等聚二千餘人。往來行劫。漸至滋蔓。請發兵捕。

之命兵部尚書李慶等議調兵捕勦榮從容進言謂  
彼皆愚民或爲有司所苦或爲衣食所窘不得已逃  
入山林苟活朝暮耳何敢爲亂若寬而撫之當遂散  
矣急則堅其爲盜之心况兵戈所加不免枉及良善  
願更思處置之宜 成祖曰卿言是也可勅閩浙三  
司招撫若復頑梗弗服用兵勦滅未晚旣而果悉順  
服丁亥次翠微岡 成祖御武帳中憑几而坐顧內  
侍海壽曰計程何日至北京對曰八月中可至已乃  
諭榮曰東宮歷歲滋久政務已熟吾還京之後悉以  
軍國之事委之朕惟優游暮年以享安和之福耳辛

卯次榆木川 成祖不豫召榮等受遺命傳位 皇  
太子遂崩衆倉卒莫知所措榮一遵古禮歛舍如禮  
謂太監馬雲等曰六師去京尚遠不宜發喪所至宜  
上食如常儀衆是之復條畫軍中事宜號令益嚴人  
皆莫測壬辰次雙筆峰榮奉遺命馳赴 皇太子八  
月至北京致 大行皇帝遺命退而復以軍中所宜  
施行者陳之 皇太子嘉歎賜以白金鈔幣翌旦復  
承命同蹇義等議卽位事宜榮首條民間不便二十  
餘事 上進皆嘉納之命入詔條頒布 仁宗卽位  
陞嘉議大夫太常卿仍兼前二職九月進太子少傅

兼謹身殿大學士賜銀印一其文曰繩愆糾繆且諭榮以政務闕失則用此印密疏以聞至於再三慎毋憚煩十月皇太子正位東宮榮以師傅之重朝夕侍側悉心匡輔丁巳大理寺奏決重罪上令少傅楊士奇及榮同任審錄冤抑者多獲伸理十一月丁亥上御西角門閱廷臣誥詞因取榮等三輔臣暨蹇夏二尚書誥詞親增二語云勿謂崇高而難入勿以有所從違而或怠曰此朕實心卿等勉之榮對曰皇上聖德之至臣等其敢不勉十二月加工部尚書仍兼二職降勅歷褒其功初榮扈從北征成祖

委以軍務及上賓之日所行喪禮并軍中處置事宜上聞訃之時不及訪問至是有以為言者上益重之元年正月上御奉天門朝羣臣撤樂止行五拜禮先是禮部尚書呂震請曰皇上新即位天下文武之臣以暨海外諸國悉來朝賀宜設鹵簿作樂如大朝之儀以稱瞻仰弗聽既而震固請上曰山陵甫畢忍遽即吉榮等對曰誠如聖諭必欲受朝不宜備禮從之翌日諭榮等曰為君以納言為賢為臣以直諫為忠如朝會一事若從震請追悔何及賴汝等直言幸免斯咎自今有弗逮卿毋惜言之丁



丑榮懇辭尚書俸弗允三月命魏國公徐顯宗讀書  
國子監召榮往諭司業此開國元勳之裔欲其家與  
國同久必教之讀書知道理乃可以長保富貴其篤  
意訓之五月勅修吉成祖皇帝實錄命爲總裁每朝  
退以上還宮遇有機務須計議者必親灑翰墨書榮  
姓名識以御寶或用御押封出規畫榮條對詳悉皆  
如聖意辛巳肅仁宗升遐宣宗卽位益推心委  
任榮承事尤謹閏七月勅修仁宗實錄復勅修歷  
代臣鑒外戚事鑒皆命總之八月漢王叛差百戶陳  
剛齋本指斥乘輿聲言犯闕榮曰彼謂陛下新立

必不自行故敢爾若出其不意而以天威臨之事無  
不濟臣請先行誓不與賊俱生上從其計榮晝夜  
疾馳至卽合圍督軍士築土山山成而大駕至衆  
呼萬歲聲振城中漢王知不敵遂開門出降詔討王  
斌等同爲謀者免漢王爲庶人改樂安州事平回京  
賜鞍馬白金鈔幣二年賜範銀圖書五其文曰方直  
剛正忠孝流芳關西後裔建安楊榮楊氏勉仁且面  
致訓戒以表眷待之隆又親御翰墨作春山竹石牧  
牛三圖題詩其上裝成卷軸賜榮并賜端硯御用筆  
墨十月交趾黎利遣人進前安南陳王三世嫡孫暲

表乞立爲陳氏後。上以示文武大臣。蹇義夏原吉等皆勸發兵擊利。上召榮及楊士奇定計。榮曰：交趾在荒服外，漢唐以來雖嘗爲郡縣，然叛服不常，棄之可也。時楊士奇亦贊榮言當從。上從之。十一月，皇太子生。宣宗皇帝親酌酒賜榮飲，并賜白金鈔幣及金酒器。三年二月，命榮同少師蹇義等十八人從遊。萬歲山詔許乘馬從東北門入，各携從者二人至乾明門下馬登山。繼命乘舟泛太液池至新圓殿。俄頃，宣宗乘黑騮馬至，召士奇與榮詢問民甚悉，賜以潑醅酒，人各令盡一甌。復命遊小山，看西

域所貢二獅，復遍閱諸景。日將西，令中官侍宴松林之下，各賜鈔三千貫。從者賜鈔三錠，并給酒殺。且傳旨免謝，明日入見，復各賜椰子慰勞。甚至三月奉命持節冊中宮禮成，賜白金綵幣。秋七月辛酉，賜遊苑，賜以金銀綵幣、玉杯酒饌等物。八月扈駕巡邊，給以內廐良馬，命榮先從出塞。師次寬河，遇虜衆將入寇，且道隘師難並進。宣宗親帥師勦平之，班師還京，榮進平胡詩凡十篇。上覽之喜，復沐白金鈔幣之賜。十月，上不欲煩榮以有司事，乃賜勅獎諭，令其輟翰林之務，朝夕左右一日。上問今日之貪

誰甚榮對曰莫甚劉觀。上撫掌歎曰除惡務本及楊士奇薦顧佐可代榮曰佐亦嘗為京尹能禁下吏政清弊革有旨令劉觀巡視河道拜顧佐為右都御史十二月兩遊南海子賜羊酒及鈔四年己丑正月陪祀南郊賜金銀鮮果等物十一月有重犯告都御史顧佐枉人重罪不聽訴理者。上大怒召榮及楊士奇諭曰此必有重囚教之排佐小人陷正人不可不究治及法司鞠之實千戶臧清殺一家無罪三人當死教之誣告立命磔清於市甲申陞少傅仍兼前二職三俸俱支固辭大學士俸詔許之丙申賜宴文

華殿。宣宗親待焉榮昔有賜賚必奉親及親歿而朝廷恩眷日隆至給三俸恒以親不逮養為歉乃請以少傅俸於鄉邑給受以供祭祀及周卹親戚故舊朋友之貧乏者七年正月元宵節賜觀燈於內苑仍賜白金綵幣遣中官送於其第及賜御製祖德詩招隱歌猗蘭操八年少傅滿三載賜宴禮部降勅獎諭九年扈駕巡邊給以天閑名馬比還恩賚甚厚賜詩褒嘉十年。宣宗晏駕榮與少師蹇義等僉議卽位事宜舉愜羣情。英廟卽位勅修。宣宗皇帝實錄命充總裁賜宴禮部冬十月命監立天壽山碑明

年榮與太師英國公張輔等二三大臣建議開經筵以緝熙聖學詔可其奏甲戌上御文華殿開講榮講堯典克明峻德章敷析明暢音吐鴻亮宴於禮部尋復賜金織紗羅襲衣金箱玳瑁香帶各一榮以累朝舊臣親受顧命被皇上眷寵優異慨然以身任天下之重精力瀕老而不衰遇事雖繁劇應之常若簡而有餘凡所論建動協人心五月奏少傅滿六載陞授光祿大夫柱國四月宣宗實錄成上御奉天門慰勞再三陞少師賜白金綵幣名馬宴於禮部五年二月從耕籍田禮成卽上章請告展先墓詔賜

允降勅書諭遣且命內侍阮江伴行水陸給驛公卿大臣出祖都門外觀者填道朝野榮之至家歸省先壠大散宗親故舊金幣賓客過從宴洽累月六月還京力疾就道次杭州而劇卒於武林驛享年七十內侍阮江以訃聞上哀慟輟視朝一日贈特進光祿大夫左柱國太師謚文敏遣禮部尚書胡濙等諭祭仍命江護喪歸里營葬榮在朝廷薦舉惟賢無間親疎人有因事註誤而囚繫者從容爲之解釋上知其忠直罔不聽從而陰受其惠者甚多榮歷朝四十年侍四聖左右叅贊機務惠澤及人不可勝計人

莫能知榮亦未嘗言至其往還兩京辛勤勞悴從征胡寇乘危蹈險人所弗堪亦未嘗告勞進退起居皆有常度凡所存所履務協理道絕不為戲狎之言論事命上前詞氣溫厚委曲至與僚友分別淑慝審辨邪正則凜然不可犯暇時接見朝士大夫及方岳牧守從容咨訪時政人才以備顧問所居東偏構屋環植花木扁曰靜軒退朝之暇衣冠正坐焚香煮茗與所知談論經史每至夜分朝門東南築室樹以槐柳退食則燕息其中或宴會為樂名其堂曰聚奎其議刑辟卒歸寬恕於四裔邊徼事及邊將勇怯知愚靡

不通知說者稱其相業有姚崇之風所著有默菴集雲山稿靜軒卷退思集北征訓子編

雷境

雷境字彥達建安人幼孤事母至孝性純篤究心書史家貧無以自給裕如也永樂初有司以孝薦之固辭乞歸絕跡城府鄉人從其受學者多如修撰連智輩數十人皆擢進士第後相與追號之曰慎齋先生所著有閑居叢稿

杜琮

杜琮字孟清號蒙齋甌寧人永樂初應詔預修大典



領應天府辛卯鄉薦歷上高全椒二學教諭用選拜  
監察御史陞山東布政司叅議皆克舉其職卒于官  
所著有適興錦江二集藏於家

潘賜

潘賜字文錫浦城人永樂初登進士第授行人嘗使  
日本還朝獻德化書大典頌太宗皇帝覽之稱善  
命入史館擢鴻臚少卿再使日本回陞江西布政司  
右叅政後落職洪熙元年起為南京刑部主事長於  
斷獄律比精詳宣德間復除鴻臚少卿又使日本歸  
宣德皇帝甚加獎勞未幾卒于官居官操履方正

所著有容菴等集

雷璉

雷璉字有螭建安人永樂中進士選為翰林庶吉士  
纂修國史拜監察御史巡按雲南奏劾內使十有九  
人悉寘於法還朝復命以語音不正出知蕪湖縣後  
以薦起為浙江按察司僉事振肅紀綱風裁凜然會  
處州草寇葉宗祺竊發璉勅滅之尋奉勅巡視浙江  
福建江西三省海道許其便宜行事歷八載卒于官  
浙人哀之以詩有除却數函圖冊外別無一物載歸  
舟之句

黃童

黃童字仕穉政和人由太學生擢陝西按察僉事左遷寧遠縣丞 太宗正位陞監察御史奉命巡按直隸淞江時吳江平望八尺湖多盜賊童假民船載粟詐為客商賊至密以灰水灑之翌日驗有灰跡者捕之悉得真盜蓋即巡檢司弓手也仍奏置石堤於湖中為水門時其啟閉劫掠之患遂息嘗道見一大蛇昂頭若有所訴童問曰汝必有冤乎蛇即叩頭而去令人尾之抵一人家後園入穴內掘之果得劫殺客商之屍因抵於法人以為神後陞廣西副使卒于官

張崇

張崇字存高建安人永樂中由太學生授蕭山知縣為政仁恕有愷弟之風秩滿陞通判撫州轉處州所至有清操民至今懷之致仕卒于家

江禎

江禎建安人登永樂甲申進士第授禮科給事中特立不附禎面常紅赤色一日奏對 上前 上以為被酒禎不敢辨遂謫為都察院吏踰年 上始悟特除龍游知縣為政務存大體有惠愛於民民甚得之卒于官



黃仲芳

黃仲芳字時茂建安人永樂中進士選為翰林庶吉士知東陽縣首鋤豪民及奸吏之為民患者鄰郡有盜犯境仲芳以計殄絕之郊有三虎為暴仲芳移文城隍果射中其一餘遁去秩滿邑民詣藩臬懇留弗獲有涕泣者大臣以才行薦擢湖廣左叅議施州有偽土官田姓者殺兄而奪其位越十有八年捕之不能得仲芳設方略擒之尋遷雲南右叅政奏開中鹽之法以助軍餉卒于官所著有澹菴集旬宣集琴堂薇垣平恕錄

黃福

黃福字汝錫甌寧人博通經史領鄉薦授杭州府儒學訓導勤於教誨生徒多所造就陞太常博士永樂中與修五經四書及性理大全諸書陞本寺寺丞

楊誠

楊誠字性之松溪人永樂中領鄉薦授四會訓導秩滿陞天台教諭改縉雲所至陶淑士子多所成就以致仕卒操履端方問學該博所著有鐵崖藁

葉彬

葉彬字允均建安人父濬永樂丙戌進士知鄱陽縣





本朝分省人物考 卷之二十二 楊悅  
一日公出暴水壞廨垣彬祖母令人撤榜板以權蔽  
讎家發其事彬母聞法當論死欲以身代彬時年十  
歲卽自詣官首實得收贖後都察院疑其獄逮問拷  
掠再四終始一詞甫得聖裁宥免未幾父卒祖母  
亦故彬與母同扶二柩還家母誓不再醮躬親紡績  
以給彬學後彬學成歷六安虞城二學教諭

### 吳廷用

吳廷用政和人永樂中登進士第授戶科給事中  
仁宗監國廷用侍從二十餘年小心謹密甚蒙寵眷  
暨嗣位特陞刑部左侍郎宣德間陞禮部左侍郎歷  
任咸有能績累章乞歸老卒

### 林順

林順字孝從政和人號遲軒弱冠爲鄉校師學者多  
所造就永樂間邑令黃裳舉孝廉不起又以楷書薦  
力辭不起終身守澹素遠榮利視冠服若穢夷然不  
屑年八十八卒于家

### 余畝

余畝字希尹政和人性凝重寡言蚤喪父獨奉母以  
居讀書刻苦有造詣鄉人從之遊者隨才質高下皆  
有所得下筆作詩文頗有古意永樂間邑以楷書薦

郡守芮麟令書字以觀畝因書遊子吟復之遂拂袖歸

連均

連均字士平號素菴建安人登永樂乙未進士第授監察御史遷江西布政使所至皆有能聲歷仕垂四十年產業無有所增拓子孫僅免於饑寒人稱其廉天順初致仕卒于家


陳榮

陳榮字希仁甌寧人少失怙事母孝謹備極甘旨母患目疾失明晝夜扶持不少離每夕稽顙北辰祈母

目復明似聞有人語曰以舌舐之愈榮如其言凡十年一旦復明母後患病卒二日心尚微溫乃以藥灌入鼻至夜復甦年九十四終永樂丙申建寧大水二子俱髻年乘流一夜餘抵福之螺洲遇潮衝達岸得不死隣家弗戒于火及其廬數四輒反風而滅鄉人以爲孝感所致

張添保

張添保字求安浦城人天性至孝痛父早世言及輒流涕哽塞事母尤謹承顏順志未嘗少懈母患癰親爲吮血及卒殯殮葬祭一于禮鄉間有貧窘無告者



計家資有餘卽推以賑濟之義方之教尤篤長子善登永樂辛丑進士第拜監察御史

張善

張善浦城人登進士拜監察御史以廉介自持出按廣東馬軍林思祐倚權勢肆行剽掠害民滋甚善捕其黨三十餘人寔諸法民賴以寧尋致仕去

范忠

范忠甌寧人登永樂甲辰進士授兵部主事以謹厚稱嘗奉命往蘇松等府捕盜綽有能譽

鄭以誠


鄭以誠甌寧人永樂中領薦授吏科給事中陞雲南叅政招撫千厓南甸流移二千五百餘戶開懇通海河西二縣荒田二千五百餘畝種種咸有成績

陳遜

陳遜浦城人登永樂間進士任監察御史廉介有直聲累陞雲南布政使卒于官囊無餘貲都督沐昂為棺殮以歸其喪

田忠

田忠建安人由宣德間進士累官江西左叅議致仕家居二十餘年自奉泊然平生不肯干人以私非公



事未嘗一至官府至於晚節屹立凜然不少屈抑人  
以為難

裴旻

裴旻崇安人登宣德進士累官江西僉事廉介嚴毅  
糾察不避權貴風紀肅然卒于官士論惜之

雷吉生

雷吉生建安人由宣德進士除御史正色立朝巡歷  
江西湖廣山東所在風裁凜凜貪墨斂迹

雷潛

雷潛建安人宣德中領鄉薦除武選司主事陞郎中

正統己巳之變死于難

吳智

吳智甌寧人領宣德己酉鄉薦累官國子助教所在  
嚴約束敦士習多所造就子文第進士

龔貴

龔貴浦城人領宣德中鄉薦歷官撫州知府所至興  
學校雪冤滯以政績著聞

滕員

滕員字尚默甌寧人幼以開敏聞于鄉鄉之父老異  
之曰滕氏子年幼而質粹不凡子也年十一補郡庠

弟子員庠之師儒奇之曰滕某質厚而性敏遠大器也未幾領鄉薦卒業太學聲譽焯起同舍生成心服之正統己未吏部考選居優等得廣之韶州府同知一時同選者咸謂其才與官宜抵任值歲歉公私無積貯守以下無籍手地員至傾囊得白金若干兩告糴鄰郡命里耆籍民之窘甚者給之全活數千人郡治舊爲淮王府王遷國之饒得請復爲郡其規制侈大非人臣所宜居又吏胥公退無所於處往往雜就民胥員截長縮大削雕還樸度地爲吏舍限其出入絕吏民交構之弊所部地介江閩湖三藩之衝主戶少而客戶多少拂其意輒相煽構而翁源乳源二邑尤甚員躬行巡省揭榜開諭許其占籍遂與編戶無異丁內艱解任吏民不忍其去比聞服闋耆老數百人詣闕乞再任朝議已除代者不允員適至遂有祠部之除在郎署踰三年正統己巳扈駕北狩死焉年五十有二

劉福

劉福建安人正統壬戌進士累官河南按察使所至持憲嚴明人不敢犯搜奸除蠹宿弊立清尋陞浙江布政使卒

詹崇

詹崇字子源浦城人幼穎敏博學強記旁通陰陽地理星命卜筮之書歷上海進賢二學訓導正統丁卯典四川文衡陞南昌學教諭善誘後進多所成就陞潮州府學教授幾三載卒于官有竹軒集

蘇鏞

蘇鏞字良璇建安人別號守愚性敏好學善顏柳書法以孝友稱正統間沙尤寇起延及鄉里有司以其信行素服委之招撫躬抵逆巢衆皆退聽邑賴以寧年七十終

張璫

張璫字孔圭自號慎菴浦城人年十一游邑庠卽問聖賢行已之要於師師異而禮之年二十七貢諸禮部卒業南雍成化庚子舉應天高第屢不利禮闈丁未試吏部簡授江西贛州府推官時汀韶寇大侵贛境重以饑疫民死徙殆盡璫持檄走諸邑增治城壕勞徠周卹瑞金石城二縣故無城城自璫始當是時璫力爲規勸且屢請發帑於上語甚切至活者數萬人旣又重逃復之典權婚嫁之宜申掩埋之令稽古荒政而加敏惠焉其治刑尤加意疑獄他郡獄未理

者亦多移蒞於獄有俠民金伸誣告死罪轉引二十餘人獄死者過半獄得其情亟白於錄囚使者釋其未死者七人在官前後平反死刑四十餘人徒流以下者不可勝紀秩滿擢贛州同知獄職清戎清戎某御史方以苛察繩下虐及無辜獄抗言無隱見抵弗顧既而嘆曰吾不能殃民以奉人與其覲顏於位退不猶愈乎即移疾請致其事疏發三日遂行至廬陵病卒性孝友以祿不逮父養養母曾氏甚謹與諸兄處愛不忘規自奉約而急於周人外重內剛不以權貴奪而理芴修墜裕如也嘗集古格言為世訓一卷

所著詩文有慎菴小稿六卷錦江雜咏四卷藏於家

龔沅

龔沅建安人弱冠以文名登成化己丑進士授主事督稅兩浙焚香自矢不私一錢商無過取國有餘課士論賢之

吳浩

吳浩建陽人由國子生授肇慶府經歷受命築四會新興二縣城有化盜安民善政從征廣西累受旌賞

江沂

江沂建安人自少豪邁不羈登成化丙戌進士授監

察御史出按外藩綽著能譽陞四川副使致仕

咎祥

吳文元

吳文元甌寧人成化丙戌進士除御史巡按浙江禁  
奸革弊無所顧忌杭大火民不堪命乃發倉給食民  
賴以安歷河南按察使卒端重詳雅居官務存大體  
不察察為明於權要竟未嘗少屈人稱之曰百鍊剛

康太和

康太和字原中莆城人弱冠補邑庠嘗遇貞肅林見  
素于道林降輿與揖明晨踵謝林延坐獎進者久之  
甲午領鄉薦明年登進士世宗皇帝御文華殿親

試選庶吉士丁酉授編修辛丑同考會試乙巳預修  
會典巳酉主試順天辛亥遷右春坊右諭德癸丑主  
順天武舉是年遷翰林侍講學士視院篆分宜用事  
無論館閣莫不奔走其門和絕跡不事干謁筮仕幾  
二十年始進南京禮侍時倭夷孔棘詔九卿各陳所  
見和疏屯要害練鄉兵固防守寬委任四事上嘉  
納丁巳考績和守南部八年不調或諷之乃作拙宦  
對以述巳志辛酉遷南工部尚書正巳率屬罷一切  
浮靡之費會景王分藩之國道金陵凡百經費皆預  
為之備綜理之周識者嘆服癸亥再疏自陳上允



致仕初郡城陷士夫多避亂徙居會省和因僑寓嘉禾越四年還莆覩邑里蕭條愴然流涕因捐俸賙給族黨暇與司空林端簡及同輩年七十以上結社爲樂或以擬之香山年八十卒所著有礪峰集

徐彪

徐彪字宏傑浦城縣人性至孝事父母菽水必親善承顏色無有違志父疾湯藥嘗而後進宵衣侍卧起不解帶者三十餘年既終爲孺子泣骨瘠幾不勝葬殮一皆如禮廬於墓側日夜悲號不絕聲歸乃刻木爲二像謹事之時時上食有他出則告而行有時物

必薦而後敢嘗遇忌辰素服哭泣兄死遺一女撫養之不啻如已子疏屬有貧而鬻男者取券代贖鄰有蔡四者被負而嫁其妻爲償其負而返之盜入其家祛篋竊貲既獲諭之曰若亦逼於饑寒耳予忍被爾以盜名哉亟改行無罹於辜今子姓蕃昌科甲接武邑令書其堂曰熙德御史具奏豎坊旌表其門

彭僖

彭僖字樂善崇安人少負才氣由太學生授崇德縣丞縣當水陸之衝民繁事殷號稱難治僖代其長區畫事事有條復以慈祥愷悌行之民歌誦其德六載

上章懇乞致仕老稚留之不可得相與裹糧孥舟送至浙江泣別而還

滕康

滕康字景晉建安人由鄉貢通判松江改惠州所至多善政藩臬交薦之陞知惠州府廉勤沉靜舉措不苟在任十餘年政蹟顯著

吳義

吳義字用宜政和人景泰間知零陵縣恒以清正自持吏畏民懷幾三載丁內艱歸行篋蕭然民爭致贖贐郡守亦憐其貧以帑藏餘財資之俱不受比服闋

詣部以疾致仕

趙熙

趙熙字文輝浦城人正統間由太學生授濱州判官為人淳謹愿慤勤於問學素履尤持重篤實與物無忤自筮仕初以致歸老冠服不改其舊人稱其有儒素之風

魏祖忠

魏祖忠字邦直建安人自幼讀書恒以古人自期父康以丁產應廣實倉斗級虧糧法當論死祖忠毅然別妻子詣官請代父罪繫獄歲餘典刑官至將論決

忽遇恩宥得原免人以爲孝感所致

黃賓

黃賓字朝用崇安人性孝友溫和問學有源委由邑庠生入南雍文行爲六館最援例歸省中途聞父喪徒跣匍匐至家葬父于白花巖下疏食水飲廬于墓側終其喪親族有不克葬者推地以與之卒之日邑人咸悼惜奔走哭吊者踵相屬於道

蘇鉦

蘇鉦字良聲別號竹坡建安人性孝友尤穎敏淳篤喜讀書好吟咏善書翰及寫竹石花木山水爲人所珍雖居城市日閉門不干世事一時大夫士咸禮敬之所著有竹坡吟稿二十卷藏於家

徐驥

徐驥字尚德浦城人性恬靜常爲詩文不以榮進介意由邑學弟子員陞太學偶得例授府知事之職以歸題其遊息之所曰安靜日以經史自娛家雖貧處之裕如也邑士夫高其學行皆遣子弟從之遊邑之登賢科者多其所造就也所著有洪範解訂正皇華詩及文

楊旦

楊旦字晉叔號偲菴建寧府建安縣人太師文敏公  
曾孫髫齡穎異絕倫領成化癸卯鄉薦庚戌登進士  
二甲第一名授吏部歷驗封考功時太宰青谿倪公  
岳性嚴毅慎許可顧獨器重之繼青谿者鈞陽馬公  
文升尤峻急難近每持正議初若相迕卒乃韙其言  
嘗考察京職有佞夫被黜黃緣奏辯者有旨再覈實  
馬倉卒拜命欲改擬以從旦毅然持不可曰祖  
宗來未有此例且倖門一開後將謂何都御史浮梁  
戴公珊亟是之而馬亦悟竟覆罷甲子陞太僕少卿  
乙丑改太常正德丙寅乞命歸省蒙路費寶鑑之

賜丁卯起復逆瑾欲一要見卒不見遂以違限例出  
知于溫溫海邦也地大物衆務劇奸褻治之不遺力  
郡以大治自謫宦以來大書上帝臨汝毋二爾心于  
座右僚吏遵度不敢縱居溫二年庚午遷爲浙江副  
使督學政會當鄉試以五閱月週迴數千里所校士  
允愜公議辛未逆瑾誅起爲應天府丞尋進尹順天  
順天素號煩劇難治竟就緒貧民有負肉供不能償  
者請以贓罰并帑藏之美者以代仍禁縣吏無重科  
巨寇劉六等流劫近畿又四方流民薦食京師道殣  
相望募人爲叢塚收葬之人多感泣壬申陞南禮

右侍嘗攝國子監事士心歸之尋轉禮右侍掌太常  
寺事裁抑浮費民力賴以少紓丙子改戶侍奉勅  
總督京通等倉時總督監督中貴人多且剗剔奸蠹  
持正不回屬官倚以爲重而中貴人久亦自服尋陞  
都察院右都御史總督兩廣軍務兼理巡撫時嚴枉  
道之禁念母老疏請便道展省允之抵家侍彌月亟  
戒行以夏六月抵任乃肅紀綱飭武備省刑獄汰苛  
濫百度燦然一新會番禺清遠河源等縣蘇峒十八  
山滴水巖青龍崗帽子峰等寨徭獍負固稔惡所過  
大肆焚掠民甚苦之乃調集官軍土兵命僉事王宗

源都指揮董禎等分道並擊斬級俘獲不可勝紀捷  
聞 璽書褒獎已卯秋宸濠之變南贛撫治都御史  
陽明王公咨援兵旦卽委兵備僉事王大用朱昂都  
指揮歐儒于大經整兵以行尋得報元惡已就擒地  
方底定遂罷行田州府土官岑猛知府岑濬族黨也  
弘治間濬亂猛降級指揮僉事因功陞指揮同知夤  
緣 奏辯覬復其官會龍州知府趙源亡嗣襲以姪  
相猛因黨其妹所立假子韋璋者賂京還驛使詐傳  
詔旨起兵遂與璋襲破龍州逐知州趙相乃賂遺  
本兵及當國者猛圖以功贖罪復原職璋圖冒趙宗

奪龍州請託於旦執不可當國者廣人也子弟素與  
叛人通而本兵司馬擅作威福巡撫者歲有厚餽旦  
獨無三人交怒乃嗾巡按廣西御史曹珪誣劾之吏  
部爲之駁白誣竟不行未幾聞母周夫人訃奔喪歸  
家哀毀踰禮嘉靖壬午服闋遂起掌南院尋陞南戶  
書甫涖任又改南吏書甲申秋吏部白巖喬公宇致  
仕廷議會推 旨又改旦以比具疏力辭不允會  
見山桂公羅峯張公以傳奉陞學士旦率部院諸老  
上疏論列語極激切用是忤 旨遂爲給事中陳洸  
所誣劾疏下吏部議時左侍郎孟公春覆題亟辯其

誣竟有 旨令旦致仕公論大譁旦抵家坦然自適  
放情於溪雲山月間以詩酒自娛旦祇事 三朝駁  
歷中外幾四十年所蒞若銓衡學校甲兵錢穀禮樂  
及刑獄馬政邊防皆諳極要領且清介絕俗奉身甚  
約至於軫窮恤族諸惠利事則爲之又甚力性至孝  
奉母周夫人雖顯貴侍養不少衰初成化間宗黨構  
難業已籍沒比貴乃力贊其兄昂雪辯竟蒙 恩復  
如初文敏公祠雖立而祀未虔乃疏以請卒如南陽  
李文達公例春秋祀焉月朔必薦新且必具衣冠率  
諸子姓謁祠退而立諸堂下必訓以忠孝大節庚寅

秋七月危坐而逝

立請堂... 必防... 天...



文化藝術

本世周夫人... 除至... 艾... 整中... 效... 醫...

七

